

فريق التفريغ بموقع الطريق إلى الله

يقدم

وقفات مع سورة العنكبوت ج 2 (باللهجة المصرية)

فضيلة الشيخ : حازم شومان

رابط المادة : <http://way2allah.com/khotab-item-117559.htm>

معنى الالتزام

السلام عليكم ورحمة الله وبركاته

الحمد لله وكفى، وصلاةً وسلاماً على عباده الذين اصطفى، اللهم لك الحمد كله، ولك الملك كله، وبيدك الخير كله، وإليك يرجع الأمر كله، اللهم صلي على عبدك ونبيك محمد صلى الله عليه وسلم في الأولين والآخرين وفي كل وقت وحين .. أما بعد إخواني واخوانتي ربنا يبارك فيكم بتوحشونا من الأسبوع للأسبوع يا جماعة، درس خطوة أولى التزام، موسوعة مشاكل الملتمزمين والملتزمات، تدبرات في سورة العنكبوت، يعني فعلاً والله يا جماعة يعني بتوحشونا من الأسبوع للأسبوع دفعة سنة أولى ودفعة سنة ثانية وإخوانا وأخواتنا اللي من برا الدفتين يعني ربنا يحفظكم يارب، أنا وصلني مجموعة من الأبحاث اللي تعد كأنها إيه؟ يعني سكاشن كده أو علي هامش شرح سورة العنكبوت أبحاث لماذا لا يلتزم الشباب والفتيات؟ الشباب مبلتزموش ليه؟ وصلني بحث ولربك فاصبر دي من سنة أولى، ووصلني بحث لأم رحمة وريتال دي بردو من سنة أولى لماذا لا يلتزم الشباب؟ ووصلني بحث أسباب عدم التزام الشباب للأخت رابعة رمز الصمود دي من سنة ثانية طبعاً، ووصلني بحث لماذا لا يلتزم الشباب للأخت آية محمود دي من سنة أولى، ووصلني بحث من أختنا خديجة محمد فرج دي من سنة أولى، ووصلني بحث لماذا لا يلتزم الشباب لاختنا أول شهيدة وسلسيل والمشتاقه للفردوس ريهام دول من سنة ثانية، فبفضل ومنة الله - سبحانه وتعالى- أنا الحاجة اللي مفرحاني يا جماعة جداً إن سنة أولى بدأ يبقي ليها وجود بقي إن أنا بدأت أحس بوجود سنة أولى معانا، آدي بحث اتنين تلاتة اربعة، ما شاء الله لا قوة الا بالله، أنا يعني مستني إن أنا أشوف إنتاج سنة أولى، مستني إن أنا أشوف كوادر سنة أولى، مستني إن أنا أشوف ثمرة سنة أولى، يعني فين المتحمسين منهم؟ فين المجتهدين منهم؟ فين الأوائل منهم؟ فين اللي عندهم مواهب في الإنتاج الفني لدعم الإنتاج الدعوي منهم؟ فين اللي عندهم فكر وعندهم حماس وعندهم آمال في التطوير، فين طلاب التربية المتحمسين للتربية منهم عايزين نستكشف دفعة سنة أولى يا جماعة أنا لسه كنت بتكلم مع الدكتور محمد رفعت في اجتماع اداري للمعهد يعني بقوله عايزين نستكشف دفعة سنة أولى عشان كده فكرة مجموعات التقوية اللي هي بيعملها أوائل سنة ثانية علي بتوع سنة أولى إن كل حد من الأوائل بيمسك مجموعة يشرح لها المواد يعني كأنه معيد سكاشن كده من سنة أولى أنا نفسي الموضوع ده اظمن عليه يجيلي أسماء الاوائل اللي هيعملوا مجموعات تقوية لسنة أولى ويجيلي أسماء كل واحدة مين المجموعة بتعتها اللي هتديها ويجيلي تقرير عن الجهود ومين اللي بيتابع ومين اللي بيحضر ومين اللي مبيحضرش واية القصة يعني عايزين يا جماعة أنا نفسي افهم سنة أولى عشان كده يعني طلبة وطالبات سنة أولى أنا عايز اعمل معاهم لقاء مخصوص بيهم اسمه افتحلي قلبك لقاء مخصوص بيهم دكتور محمد بقي ان شاء الله بإذن الله يشوف يعني تنفيذها اللقاء ازاوي ويكون برا مواعيدنا في المعهد يكون معاد برا اصلا يوم الاثنين اصلا يكون لقاء كده مع طلبة وطالبات سنة أولى بإذن الله وكلهم يعرفوا بعض هذا الامر وبيبقي عبارة عن مشاكلكم الايمانية، مشاكلكم التربوية، مشاكلكم الفكرية مشاكلكموا حتي في المذاكرة عبارة عن افكاركم لتطوير المعهد يعني بعض الحاجات اللي انتوا نفسكموا تتغير في المعهد في سنة أولى اللي انتوا كنتوا نفسكموا ان انتوا يعني عايزين تشوفوها متطورة عندكم يعني بصوا يا جماعة

عايزين لقاء كده مع سنة أولى يبقي انا عايز اقابل سنة أولى واحتك بيهم كويس جدا ان شاء الله بإذن الله من خلال افتتاحي قلبك دكتور محمد رفعت عايز يقابل سنة أولى ويحتك بيهم من خلال فكرة الورش وتفعيل قضية الورش في سنة أولى واللقاء بقائدات الورش في سنة أولى بحيث ان احنا نتابع الانشطة الايمانية والتعبدية والنشاطات في سنة أولى واخواتنا الاوائل علي دفعة سنة تانية نفسهم انهم يلتقوا بسنة أولى من خلال مجموعات التقوية يعني المفروض ان احنا كلنا يعني نبرعى هذه الدفعة الناشئة بإذن الله سبحانه وتعالى لان انا زي ما توقعت ان في كوادر عالية يعني الابحاث دي بتدل بفضل ومنة الله ان في كلام عالي وفي شغل عالي ان شاء الله بإذن الله هنا نقاش انهاردة يعني انهاردة يا جماعة نتيجة ابحاث كتير انا مش عارف اخلي الابحاث علي هامش الشرح فانا هخلي بإذن الله سبحانه وتعالى فانا هحاول اناقش بحث من الابحاث شدني بصراحة بحث ولربك فاصبر بحث اعداد ولربك فاصبر بعنوان لماذا لا يلتزم الشباب ودي من دفعة سنة أولى، ركزوا معايا بقي لقد أصبح الالتزام في زماننا كلمة تصدر الرهب في اذهان بعض الشباب ويفهمونها خطأ يحسبون ان الالتزام حياة معقدة وهم لا يعرفون انه طريق النجاة الدخلة دي حلوة يعني انا بسميها رصد الأزمة، انا بحب دايمًا لما آجي أصلاً أبدأ أي درس عندي عن الاختلاط، عن التبرج، عن، عن، أرصد الأزمة، أبين الأزمة دي موجودة في الواقع أد ايه، ومنتشرة أد ايه، فهنا أختنا رصدت الأزمة، بعد كده بقي بتقول ايه، ومعنى الالتزام فلقيتها كاتبه صفحة كاملة عن معنى الالتزام، لقيتها كاتبة تلتاشر تعريف للالتزام، الملتزم هو الإنسان العادي الذي قرر الا يكون عادي، الملتزم هو الذي قرر أن يترك طريق الشهوات والشبهات، يترك الدنيا و يعلم أنه سيأخذ كل شيء، الملتزم هو ذلك الإنسان الذي قرر ألا يرضى بالدنيا ولا يطمئن بها وهو على يقين أن ما عند الله باق لا ينفد، الملتزم هو الإنسان الذي قرر أن يتحمل ما كلفه الله به من أوامر ونواهي وحال لسانه يقول سمعت يا رب وأطعت، الملتزم هو ذلك الإنسان الذي قرر أن يكون سعيدًا فلم يجد السعادة إلا في الالتزام وحمل هم الدين ونصره، الملتزم هو ذلك الإنسان الذي قرر أن يكون غريبًا في وسط أناس لا يشغلهم إلا الدنيا والشهوات، الملتزم هو ذلك الإنسان الطيب الذي يسعى لإرضاء الله بكل السبل، الملتزم هو ذلك الإنسان الذي يحمل بين جنبيه هم إخوانه، الملتزم هو الإنسان الذي يؤذيه الناس ويصبر، الملتزم هو الذي يقشع بدنه عندما يسمع القرآن، الملتزم هو ذلك الإنسان الذي قدم مراد الله على مراده، الملتزم هو ذلك الإنسان الذي يعتصر ألمًا حينما يجد جسد الأمة قد تمزق هنا وهناك، رقم تلتاشر الملتزم هو ذلك الإنسان العادي الذي قرر ألا يكون عاديًا، يعني هي ايه جابت الأول تاني، ايه التعليق بتاعي على هذا الكلام، لأن الكلام ده خطير جدًا بالنسبة لكم يا جماعة، التعليق ده هو ده صورة الالتزام، يعني دلوقتي أختنا ولربك فاصبر بتدي ايه صورة الالتزام، ايه ديفينيشين، ايه التعريف بتاع الالتزام؟ فبتقول هو ده الالتزام، واضح من تعريفاتها للالتزام إن هي مستمعة جيدة جدًا للدروس الوعظية، لأن الكلام اللي هي بتقوله ده كل كلمة منه خلاصة درس من الدروس، فواضح إن هي مستمعة جيدة وبتستوعب المعاني وبتقدر تجمعها مع بعض، وده بيدل إنها لو اتعلمت دعوة صح إن شاء الله بإذن الله ممكن يكون فيه خير إنها في يوم من الأيام تبقى مصدر خير لغيرها، مصدر خير لغيرها سواء من البنات الغير ملتزمات أو الملتزمات الجدد، ولكن ده لو اتربت كويس وانطلقت كويس، طيب أنا ايه تعليقي على الكلام ده يا جماعة، أنا تعليقي على الكلام ده، إن الكلام ده بس لو خدناه ووقفنا يعني لو خدنا الكلام ده ووقفنا من أكبر أسباب الإحباط عند الملتزمين والملتزمات، من أكبر أسباب الإحباط في التيار السلفي هو أننا نتوقف عند هذا الكلام، من أكبر أسباب الإحباط في التيار السلفي ويهدم نفسية الإخوة والأخوات إن كثير من الدعاة بيقول الكلام ده ويسكت، الالتزام وعلو الهمة، طب وبعد كده؟

قاعدة العمر

عشان كده انا بديكوا قاعدة يا جماعة قاعدة عمر، القاعدة بتقول اللي قالتها أختنا ده هو ولربك فاصبر ده اسمه المثالية في تصور الهدف، إن صورة الالتزام لازم تفضل عالية، ولازم كلمة

الملتزم دي تبقى كلمة خطيرة، مش أي واحد يقول على نفسه ملتزم، أنا بحاول التزم، أنا نفسي التزم، إنما مش كل واحد طلع له شعرتين في وشه ولا كل واحدة حته قماشة غطت أنفها وفمها تبقى إنسانة ملتزمة أو بقى إنسان ملتزم، الالتزام ده كلمة كبيرة ولازم تفضل كلمة كبيرة، يبقى أنا موافق على الكلام اللي هي قالته التلتاشر تعريف للالتزام، ولكن بقول إن هذا الكلام تصديره لوحده للشباب وللإخوة وللأخوات هو سبب في التحطيم النفسي ليه؟ لأن أنا اديتهم مثالية في تصور الهدف، الالتزام ده شيء كبير، كبير، كبير، إنتو عارفين يعني ايه دين، يعني ايه ملتزم، الملتزم الإنسان اللي قلبه مع ربنا وحياته لله، الملتزم ده هو الصوام القوام، الملتزم ده هو المجاهد المضحي، كل ده كلام جميل جداً وهو ده الحقيقة وهو ده الملتزم، ولكن اللي أنا معترض عليه إن مفيش بعد كده واقعيون في تصور الطريق، إن بعد ما رسمنا الصورة المثالية نقوم جايبين الناس ونقول لهم بصوا، بصوا بقى، عشان توصلوا لصورة الالتزام الحقيقية فيه طريق، الطريق ده، المثالية في تصور الطريق هي سبب تحطيم نفسية السلفيين، السلفيين يا جماعة أو بنات وشباب السلفية العامة شعارهم مثاليون في تصور الهدف مثاليون في تصور الطريق، إزاي الأخ يدخل يسمع عن السلف اللي كان بيصلي ألف ركعة في اليوم وعن اللي كان بيختم القرآن مرتين كل يوم وعن اللي هو بيموت قال لبنته يا بنيتي أنا في الركن ده ختمت القرآن ألفين مرة، وعن.. فالأخ يدخل أو الأخت تدخل يبقى هو ده الدين، يبقى أنا لازم النهاردة ابقى كده، شوفتوا يا جماعة ركزوا معايا، اللي هيركز معايا ده إن شاء الله بإذن الله هيبقى فاهم يعني ايه تربية نفسية، لأن قضية الإحباط عند الملتزمين والملتزمات دي تبع التربية النفسية، هيبقى فاهم يعني ايه تربية نفسية، يقوم الأخ الداعية اللي قال له ختمة القرآن ألفين مرة في العمر وألف ركعة في اليوم وكان فلان ببسبح ألف وسبعماية مرة في اليوم، ما قالوش إن الكلام ده له طريقة عشان توصله ما قالوش إن الكلام ده في سلم عشان تطلع وتوصله هو سخنه وسابه، فرجع الأخ أو الأخت عايزين يطبقوا الكلام ده، فيجي يطبقه مش عارف إن الكلام يا اخوانا بينك وبينه طريق طويل جداً جداً، طريق عمر يا جماعة، فيقوم الأخ يجيله إحباط، أنا فاشل أنا فاشلة، الأخ فاشل والأخت فاشلة، مش فاهمين إنهم مش فاشلين ولا حاجة، ولكن هم مثاليين في تصور الطريق، طيب تعالوا بقى يا جماعة نتكلم عن الواقعية في تصور الطريق، يعني ايه؟ يعني دي دلوقتي اتكلمت عن الالتزام، قلنا احنا دلوقتي هيدور كلامنا عن كلمتين، الكلمة الأولانية مثاليون في تصور الهدف يعني ايه مثاليون في تصور الهدف، لازم كلمة الالتزام تفضل كلمة عالية، كلمة الالتزام ذكرت في القرآن؟ هه سؤال ليكو كلكم كلمة الالتزام ذكرت في القرآن؟ الشاطر يكتب على الشاشة الشاطر يكتب على الشاشة ونشوف هه كلمة الالتزام ذكرت في القرآن؟ كل اللي معايا بيقولوا لأه، والكلام ده مش صح، ذكرت في القرآن، ايه كلمة الالتزام ذكرت في القرآن غلط مش الاستقامة ولا التمسك كلمة الالتزام، مادة ل ز م .. قرن في بيوتكن ايه بس يا اخوانا، ايوه ما شاء الله الدكتور محمد رفعت قالها " **أَنْلَزْ مَكْمُوها** "، قال لك أطول كلمتين في القرآن ايه؟ فأسقينكموها، وأنلزمكموها يعني الكلمة نفسها لما جات في القرآن جات كلمة مش أي حد يعرف ينطقها أصلاً، فضلاً عن إنه يطبقها، يعني دائماً الكلمة دي من الكلمات اللي الملتزمين الجدد ما بيعرفوش يقروها " **أَنْلَزْ مَكْمُوها وَأَنْتُمْ لَهَا** **كَارهُونَ** " هود:28، يبقى اللي يقول لك بعد كده كلمة الالتزام دي بدعة قل له يا حبيبي دي جات في القرآن، ده ربنا قال على لسان سيدنا نوح " **أَنْلَزْ مَكْمُوها** "

الالتزام في حياة الملتزم والملتزمة

يبقى الالتزام يا جماعة مش الدقن والنقاب، الالتزام يعني إن في أورد عباداة إنت لازم نفسك بيها، إن في أورد دعوة إنت لازمة نفسك بيها، إن في دروس إيمانية إنت لازم نفسك بحضورها، يقول لك ده أمر لازم يبقى فيه حاجات إنت ملازم ليها، يبقى إنت ملتزمة بساعتين قيام قبل الفجر، إنت ملتزم بجولة دعوية إسبوعية، هو ده الالتزام يا جماعة، عشان كده كلمة الالتزام دي أصلاً موجودة في علم الإدارة في الدنيا، يقولك إن في تلت محاور يقوم عليها الحضارة والتقدم، من

ضمن التلت محاور الالتزام، يعني كلمة الالتزام عند أهل الدنيا دي من أسباب الحضارة من أسباب النجاح، عشان كده سورة العنكبوت كلها أنا بدرسها لكم عشان تفهموا يعني ايه التزام، لما قلنا **"وَلْيَعْلَمَنَّ اللَّهُ الَّذِينَ آمَنُوا وَلْيَعْلَمَنَّ الْمُنَافِقِينَ"** العنكبوت:11، دي آية مكية، النفاق ذكر في مكة! آه عشان تعرفوا إن ممكن واحد ملتحي ومنافق، ممكن واحدة منتقبة ومنافقة، يا نهار.. يعني احنا ممكن نبقى منافقين! آه ممكن تبقوا منافقين، يعني الالتزام، يعني الأخ اللي مش شغال في الدعوة ده دينه في خطر، الأخت اللي ساعة الفتن بتبعد عن الدعوة وتسبب الدين وتسبب أخواتها وتروح عشان الدين بقى في خطر. دي على خطر كبير جدًا في دينها، عشان كده يا جماعة تربية الملتزمين الجدد والملتزمات الجدد على معنى الالتزام الصحيح من خلال سورة العنكبوت، من خلال سورة العنكبوت إن الدين ده خطوط حمرة ما ينفعشي تنكسر، ملتزم ما يبطلش علم ما ينفعش، ملتزمة ما بتحاولش تصلح قلبها ما تنفعشي، ملتزم ما بيحضرش دروس ده مش ملتزم أصلاً، ملتزمة وما بتشتغلش في الدعوة وبتتعلم دعوة، ملتزم وما عندوش صحبة سالحة وبيئة إيمان ومربي الكلام ده يا جماعة ما ينفعش، ملتزم يعني إنسان مميز عن البشرية كلها وإنسان عنده هدف إنه يوصل للفردوس الأعلى، يبقى كل اللي أنا قلته ده بقى كل اللي أنا قلته تبع ايه؟ اكتبوا قدامي على الشاشة، كل اللي فات ده تبع ايه؟ هه تبع عنوان ايه؟ تبع عنوان...هه...الملتزم إنسان مميز ايه بس! كل اللي أنا قلته ده تبع عنوان مثاليون في تصور الهدف، مثاليون في تصور الهدف هو ده الالتزام، هو ده الالتزام في القرآن والسنة.

واقعيون في تصور الطريق

تعالوا بقى لما نتكلم عن واقعيون في تصور الطريق، لإن طرح صورة الالتزام من غير ما نقول للناس الطريق جريمة، أنا والله يا إخواني أنا فكرت أتوقف عن الدعوة فترة والله لحد ما أفهم الطريق إلى الالتزام ايه، عشان ما بقاش مجرم أقعد أسخن الشباب وفي الآخر يطلع ناس مرضى نفسيين محطمين لأنه مش فاهم الطريق، إنتو عارفين أنا دلوقتي بفضل ومنة الله معظم الكلام اللي بقوله السلم وازاي نقبل الترقى التدريجي وازاي نوصل للالتزام واحده، واحده، وقواعد النجاح في الدين عشان كده أنا باعتبار الوقتي المجرم هو الأخ اللي بيسمع الكلام ده وما بيطبّقوش، ليه؟ لأن زمان الدروس، كثير من الدروس الواحد اتربى عليها ما كنش بيقول الطريق ايه، احنا نفسنا اتحططنا نفسيًا، أنا مرضت بالقلب وأنا طالب في الكلية لأن ما كنش حد بيقولنا الطريق اوصل ازاي، كله بيتكلم عن الصورة المثالية، طب اوصل ازاي مفيش اوصل ازاي، ده احنا هدف سلسلة سورة العنكبوت إن إنتو تتعلموا اوصل ازاي في هذا الطريق، مش بس المثالية في تصور الهدف لكن الواقعية في تصور الطريق.

الطريق إلى الالتزام وقواعد الوصول

(1) تقبل الوقعات

خدوا بالكوا بقى معايا الطريق إلى الالتزام وقواعد الوصول اللي هي الواقعية، واحد تقبل الوقعات، اللي عايز يوصل لازم يتقبل الوقعات، لازم يتقبل إن هو يقع، لازم تتقبل إنك هتقع ايه! هقع! ده احنا بيكلمونا عن المية وعشرين ألف تسبيحة في اليوم، والألف ركعة في اليوم، والستين ختمة قرآن في شهر رمضان أقع ده أنا لو وقعت أبقي منافقة وأبقي ضايعة، أنا لو وقعت أبقي إنسان، ده أنا لما بقع في معصية أنا بحس إن أنا منافق ومش قادر اتكلم في الدين، لأن أنا، هو ده المشكلة بقى بتاعتنا إن احنا بنربي الناس على إن مفيش، إن الالتزام ده قديس، مجموعة من القديسين والقديسات لأ في حاجة اسمها وقعة، عشان كده ايه الفرق بين الملتزم والعاصي، مش إن الملتزم ما بيعصيش والعاصي بيعصيش، غلط، إن الملتزم لما بيعصيش بيقوم ويتوب، إنما العاصي لما بيعصيش بيستمر ويكمل، هو ده الفرق، إنما ده بيقع وده بيقع، والملتزم بيجاهد إنه يتخلص من المعصية إنما العاصي مش فارقة معاه يكمل معصية أو ما يكملش معصية، فهمتوا إنتو، الملتزم مرعوب إنه يقابل ربنا بالمعاصي من غير ما يتوب منها ويبطلها، إنما العاصي مش في دماغه، يعني ممكن ايه

مش واخذ باله إنه لما يقابل ربنا كده ده خطر، والعياذ بالله، يبقى قول الرسول صلى الله عليه وسلم- **"إن المؤمن خلق مفتناً تواباً"** صححه الألباني، مفتناً يعني بيتفتن وبيقع، تواباً يعني بيقوم تاني بعد كل مرة، يبقى ده اول حاجة تقبل الوقعات، ده الطريق! آه ده الطريق، يعني ده لازم يحصل، ده لازم يحصل، الله! ايه يا اخوانا! فيه ايه! هو احنا ملايكة يا جماعة! احنا هنترسم، أنا دلوقتي عايزك توصل، تبقى صحابي مع النبي في الجنة عليه الصلاة والسلام، يبقى لازم أفهمك إن الاحباطات اللي بتحصل دي ازاي تتعامل معاها، وقعت، أنا ادبت درسين اسمهم كيف تتعامل مع معاصي السر، درسين ازاي لما تقع تقوم وتعوض، مش إن احنا نحطم نفسيتنا، ازاي نقاوم المعصية قبل ما نقع فيها، ولو وقعنا بعد مجاهدة ازاي نقوم ونعوض، هي دي كانت فكرة الدرسين.

(2) تقبل الترقى التدريجي

طب رقم اتنين، تقبل الترقى التدريجي. يعني ايه تقبل الترقى التدريجي، مفيش نطاط يا جماعة، مفيش واحد هينط نطة يبقى من الشارع يقف على سطح الدور العشرين، ده في أفلام، في أفلام سليفستر ستالوني وأفلام يا اخوانا هوليوود ده مش في الواقع يا اخوانا، في الواقع في حاجة اسمها، في حاجة اسمها سلم واسانسير، اسانسير زي القرآن والعلاقة بالقرآن، وسلم زي العبادات، ده في الواقع، إنما مفيش في الواقع مفيش حاجة اسمها نطة تخليك طلعت الالتزام وبقيت قديسة بين يوم وليلة، ده المهدي يصلحه الله في ليلة، إنما احنا مش المهدي، لازم نفهم ده كويس جداً، يبقى قبول الترقى التدريجي، عدم الشدة والاستعجال المحطمين، مرض الشدة اللي هو المثالية، إن الأخ عنده ايزو تسع تلاف واتنين في دماغه عنده ايزو عن الالتزام، هو عايز يبقى ايه؟ يبقى ايزو في كل حاجة، والاستعجال عاوز يوصل بسرعة، دول مدمرين، قبول الترقى التدريجي زي قول الله ايه **"إِنَّ الَّذِينَ قَالُوا رَبَّنَا اللَّهُ ثُمَّ اسْتَقَامُوا"** فصلت:30، ثم، ثم لو تفيد التراخي الزماني يبقى ربنا راضي، يبقى معناها إن إنك التزمت، استقاموا دي يعني إنت بقيت إنسان مستقيم، مستمر، عندك اورادك، يعني بقيت سوبر ملتزم بقي، يبقى ما بين الالتزام وبين الاستقامة فيه ثم، فيه قمت ووقعت، قمت ووقعت، وبعدين جالك فتور شوية، الموضوع مش كده يا اخوانا، الموضوع مش كده، يعني والله يا اخوانا، يعني ايه، أنا مش عارف اوصلهلكوا ازاي، يعني النهاردة قاعد افكر أيام ما كنت أنا في قناة الرحمة، أيام لماذا محمد وعلى فين يا شباب والحاجات دي والسلاسل دهية، أنا أيامها كنت معتقد إن أنا مشغول جداً، وإن أنا ببذل لديني بقي، ومفيش في حياتي حاجة تانية، فالوقتي بفضل ومنة الله المسئوليات زادت كتير جداً، فأنا دلوقتي لما افكر أيام على فين يا شباب ولماذا محمد بحس إن انا كنت بلعب، بحس إن الأيام دي كانت لهو، وممكن ربنا يرقى الواحد لمستوى يحس إن الأيام دي لعب، يعني أنا عايز أقولكم يا جماعة إن الدين مبيجيش قفش يا جماعة، مش قفش، الموضوع بيجي تدريجياً، الموضوع بيجي ترقى تدريجي، ثم استقاموا مش مرة واحدة، قال رسول الله صلى الله عليه وسلم- **"استقيموا ولن تحصوا"** صححه الألباني سمعت معايا، ولن تحصوا، سمعت تاني، استقيموا استمر اهه، ولن تحصوا، اوعي تفتكري إنك هتعرفي تجمعي الدين في حياتك، اوع تفتكري إنك هتكون الداعية العابد المجاهد العالم، مفيش الكلام ده، النماذج الزعبلية دي مش موجودة في الحياة، الصحابة أنفسهم كان فيه واحد متميز في العبادة عبدالله بن عمرو بن العاص، واحد تاني تميز في العلم بن عباس، واحد تاني اتميز في الجهاد خالد بن الوليد، واحد رابع تميز في، كل واحد تميز في حاجة غير التاني يا جماعة، واحد تميز في الدعوة مصعب بن عمير، مفيش حاجة اسمها واحد الشخصية اللي جابت كل حاجة، مفيش الكلام ده.

(3) قبول المجاهدة والتضحية

يبقى اذا قبول الترقى التدريجي، رقم واحد قبول الوقعات إنك إنت بتقع، اتنين الترقى التدريجي اللي هي ثم استقاموا ولن تحصوا، بعد كده رقم ثلاثة قبول المجاهدة والتضحية، إنك إنت تضحي، مش معنى كده إن الالتزام ده بقي لذيد والحمد لله أنا وقعت النهارده بس أنا ملتزمه، والحمد لله أنا

بعيد لسه ولكن إن شاء الله تدريجياً هترقى، إن شاء الله ولو بعد مية وسبعين سنة وهبقى إنسان ملتزم كويس، لا يا حبيبي دي ده تحصيلات نفسية ضد الاحباط، إنما قبول المجاهدة والتضحية، ملتزم ما بيجاهدش، ملتزم ما بيמותش نفسه عشان يوصل لربنا، ملتزمه ما بتضحيش من نومها، ما بتضحيش من دراستها، ما بيضحيش من شغله، ما بتضحيش من عصب وقتها، ما بيضحيش من لحمه ودمه عشان يوصل لربنا، مش هيوصل لحاجة، مش هيوصل لحاجة، قبول المجاهدة والتضحية يبقى رقم ثلاثة قبول المجاهدة والتضحية إن لازم تضحية.

(4) قبول المنهجية وخط السير

رقم اربعة قبول المنهجية وخط السير، إن الدين مش بدماغك، قبول المنهجية، يعني ايه قبول المنهجية يعني لازم بيئة إيمان، لازم مربى، لازم صحبة، لما أقولكم الورش يبقى لازم ورش، لما أقولكم حفظ القرآن يبقى لازم حفظ القرآن، قبول، احنا قلنا في سورة العنكبوت ايه ليه سيدنا لوط بقى نبي عشان ربنا بيقول "فَأَمِّنْ لَهُ لُوطٌ" العنكبوت:26، له، سلم نفسه للمربى، فسمع كلامه فترقى بسرعة فبقى نبي بإذن الله وباختيار الله وباصطفاء الله، يعني اللي هيسلم نفسه للمربى، عشان كده بقولكم سلموا نفسكم للمعهد القرآنى، سلموا نفسكم، سلموا نفسكم في التربية، ولما نقول حاجة نفذوها يا جماعة اعرفوا إن فيها قيمة، لو أنا ما قدرتش أتابعكم في حاجة او عوا انتو تقصروا مع نفسكم فيها، لأن أنا بالظبط زي الطبيب اللي وصفت للمريض اربع أنواع أدوية، فأنا عندي وقت فاضى إن أنا كل يوم اتصل بيه اطمئن على النوعين الاولانيين، ما اطمنتش على النوعين التانيين، فهو بقى قال ايه كويس إن الدكتور بقى مش واخذ باله أما ما خدش النوعين التانيين، ما انت يا بني الا هتفضل مريض ما هو كل ده ضرر عليك إنت، لما أنا أقولكم الورش مثلاً انشغلت الشهر اللي فات عن متابعة الورش فانتو ما نشطوش فيها، إنت اللي خسرت إنت الخسرانة دينك، لأن الورش لولا إن أنا عارف خطورتها ما كنتش عملت عليها عشرين في المية من المجموع بتاع المعهد القرآنى الدعوي، يبقى لازم إنتو تدركوا قيمة إن كل ده لدينكم فإنتم تحرصوا عليه، يبقى قبول المنهجية وخط السير ده اللي احنا ماشيين فيه مع بعض.

(5) قبول الربانية وعدم التعلق

الحاجة الخامسة قبول الربانية وعدم التعلق، النقطة دي لواحد ما كافية لتدمير حياة أي سلفي وسلفية، واحنا كلنا سلفيين ونؤمن بالسلفية عقيدة وليست مجرد منهج، إنما بقولكم يعني ايه عدم التعلق؟ التعلق بمربى معين، التعلق بشيخ معين، التعلق بداعية معين، ده أهم أسباب حرمان الأخ والأخت من الوصول إلى الله، يعني يا جماعة أنا يعني أنا الموضوع ده أيام الكلية من الحاجات اللي عطلت لي حياتي، إن أنا كنت متعلق بالشيوخ محمد يعقوب متعلق بيه جداً، إنه يفضى لي، إنه يقعد معايا، إنه يحل لي مشاكلي، إنه يناقشني في المشاكل اللي أنا بقابلها كطالب كلية، وورايا مذاكرة، وورايا دنيا وورايا فتن، وعايز انطلق ومش عارف اعمل ايه ومش عارف اجمع ما بين طموحاتي الدينية، فكنت مستني إنه يقعد معايا، بالرغم إن أنا كان قدامي الشيخ أمين الأنصاري وكان أيامها هو داعية، كان قدامي الشيخ رضا صمدي كان أيامها هو داعية، كان قدامي الشيخ هاني حلمي وكان أيامها هو داعية، كان قدامي ناس كتير أكبر مني وأسبق مني، ولكن أنا كان دماغي قفلة، يا محمد يعقوب يا بلاش، يا ده يا لاه، فكانت النتيجة إن أنا عطلت نفسي سنين بل حرمت، يعني أنا شفت رؤيا يعني إن التعلق بشخص من أسباب الحرمان من الفتح واعتبرتها رسالة ليا إن ما عدتس أتعلق بحد في طريقي إلى الله، ايوه أنا لازم يبقى ليه مربى بس مش لازم فلان، ايوه أنا لازم يبقى فيه داعية بحبه واقرب منه بس مش لازم فلان، مش لازم النجم الفضائي، مش لازم الشيخ اللي حو اليه جمهور يا جماعة، فيه دعاة ومربين ومربيات وداعيات كتير جداً، ولكن مش مشهورين وفي قمة الكفاءة، وفي قمة الكفاءة، القضية مش قضية، انتو عندكم هنا مثلاً في المعهد عندكم دكتور أحمد سيف، دكتور ضياء، دكتور محمد فرحات، مش لازم يكون بيطلع في قناة فضائية وعنده سلاسل وعنده، عندكم كنوز مهولة، مين اللي بيستفاد؟ مين اللي بيستفاد؟ يبقى

إذا دية خمس قواعد صغيرة يعني مش هي كل حاجة، تبع عنوان ايه الخمس قواعد اللي فاتم، أنا عايز حد يكتبهم لي ويكتب لي العنوان بتاعهم، هه اكتبوا لي الخمس قواعد والعنوان بتاعهم ايه، واقعيون في تصور الطريق، والخمس قواعد.. هه تقبل الوقعات، انتين تقبل الترقي التدريجي، ثلاثة إن الدين مش قفش ومش هيجي مرة واحدة ثلاثة تقبل المجاهدة والتضحية، اربعة تقبل المنهجية وخط السير، ما تمشيش بدماغك، خمسة تقبل الربانية وعدم التعلق، الربانية وتقبل عدم التعلق، يبقى دي خمس حاجات، كل ده تعليق بس على أختنا ولربك فاصبر الصفحة الأولانية من البحث بتاعها، وهي بتتكلم عن، وهي بتتكلم عن معنى الالتزام، فأنا بقولكم يا جماعة على فكرة يا جماعة يعني سبحان الله العظيم.

(6) التخلص من الصورة العاطفية عن الالتزام

في حاجة رقم ستة أنا نسيته معلش، رقم ستة أنا نسيته، اسمها التخلص من الصورة الذهنية عن الالتزام التي مصدرها العاطفة وليس العلم والفهم السليم، التخلص من الصورة الذهنية العاطفية، لو احنا عايزين اختصار شوية، التخلص من الصورة الذهنية العاطفية، وده من أكبر أسباب تحطيم نفسية الإخوة والأخوات، التخلص من، كنت لسه مع أخ من إخوانا، هو يا عيني أسير النقطة دي، فبتكلم معاه فأول محس إنه فعلاً مرض وخل حسيت إنه هيرمي نفسه من العربية، يا نهار... هو أنا أسير صورة ذهنية وأنا بحسب نفسي إني بعبد ربنا، التخلص من الصورة الذهنية العاطفية إلى الصورة الذهنية العلمية، التخلص من الصورة الذهنية العاطفية إلى الصورة الذهنية العلمية، يعني يا جماعة أكثر سبب للإحباط عند كثير من الملتزمين والملتزمات بالذات أصحاب علو الهمة الصورة الذهنية عن الالتزام، ايه الصورة الذهنية عن الالتزام، يعني أنا يوم ما التزمت يا جماعة الأخ اللي دعاني للالتزام - هو دائماً الصورة الذهنية دي بيلطشها الأخ أو الأخت من الأخ والأخت اللي دعوهم للالتزام أو أول داعية ارتبط بيه زي ما بيلطشها في الأول- الأخ اللي دعاني للالتزام قعد يكلمني عن واحد بيلف على قرى مصر كلها بيكلمهم عن ربنا، فأنا لطشت معايا إن الالتزام إن أنا أجيب هدمتين مخلة على ضهري والذات الدنيا كلها اتكلم على ربنا وما روحشي بيتي، فأنا فضلت ست سنين محطم نفسياً وحاسس إني ضايع لإن أنا مش عارف أعمل كده، فهمتوا بقي، واحد تاني دخل سمع عن السلف اللي كان بيصلي ألف ركعة في اليوم بقي الصورة عنده عن الالتزام إنه ماسك المصحف ويختم المصحف مرتين في اليوم وببسيح مائة وعشرين مرة في اليوم وبيصلي مية ركعة في الليلة، هو ده الصورة الذهنية عنده فطول ما هو مش عارف محطم نفسياً لأنه مش عارف، واحد تالت الصورة الذهنية عنده عن الالتزام إن هو إنسان قاعد على المكتب وقافل الموبايل وما يردش على تكاتفون ولا جرس وقاعد وسطه مقطوم على كتب العلم الشرعي ولا يخرج ولا يتكلم فده الصورة الذهنية للالتزام فطول ما هو مش قادر يعمل كده أنا محطم، أنا ضايع، واحد رابع ده الصورة الذهنية للملتزم مكشر ضارب مية وحداشر ما بيضحكش علطول مهموم علطول يا جماعة دي صورة ذهنية قاتلة، أنا نفسي والله العظيم مرضت، أنا كنت هموت بسبب الصورة الذهنية دي إنها جات لي في فترة من الفترات اللي هي فترة إن الملتزم اللي شايل هم علطول، مكتتب علطول، محطم علطول، قاعد علطول بقي يا رب أنا نفسي أعلى وأعلى في الدين، وإن ربنا لما يشوفه شايل الهم، ربنا هيحبه ويرضى عنه ويفتح عليه، كل ده وهم، ولا ده التزام، ولا ده التزام، كل ده حاجات الواحد لطشها، الخامس الصورة الذهنية عن الالتزام عنده إن واحد بيجري ما بين الأسر الفقيرة ويجري ما بين الأعمال الخيرية ويساعد كل الناس ويخدم كل الناس و، مقدرش يعمل كده أو اتجوز واحد بقي من النوع اللي بيقول أكلني وشربني وفسحني ولبسني وخليك جنبني، بس يحس إنه ملتزم ومحطم ومشلول ومعدش قادر يبقى ملتزم، في واحد تانية الصورة الذهنية للالتزام عندها إنها شافت مثلاً الأخت فلانة بتجري من درس لدرس لخطبة لدرس لكلمة لجلسة، فالصورة الذهنية إنها تبقى زي الشبخة فلانة

الشيخة أم فلان الشخصية الوهمية في إعطاء الدروس اللي موصلتش للكلام ده غير وهي عنده خمسة وستين سنة و البنت عندها ستاشر سنة نفسها تبقى كده زيها، يا اخوانا نحن نعبد صور ذهنية عاطفية لا نعبد الله، فيه حاجة اسمها الصورة الذهنية العلمية يعني ايه، ايه هو الدين يا أيها العلماء، عشان كده ربنا بيقول في سورة الكهف يا أستاذ ياسر هه بيقول " **إِنَّا جَعَلْنَا مَا عَلَى الْأَرْضِ زِينَةً لَهَا**" الكهف:7، يعني ايه زينة لها يا دكتور محمد، يعني ايه زينة لها، بعض أقوال المفسرين زينة لها قالوا هم العلماء، يعني العلماء، ده قول من ضمن خمس أقوال، يعني العلماء دول سر جمال الأرض، العلماء دول حياتك مش هتبقى جميلة ولا لذيدة إلا لما ترتبط بالعلماء، شفتوا بقى يا جماعة قيمة العلم، يبقى إذا الالتزام مش كده، الالتزام أبسط من كده، وله درجات وله مراحل وله سلم، بلاش تعبدوا صورة مثالية في الحياة، لازم الواحد يقعد عشرين سنة لما يعرف يوصلها، يقولك " **جاهدت في قيام الليل سنة وتلذذت بها عشرين سنة**" فيه أثر تاني " **جاهدت في قيام الليل عشرين سنة**" عشرين سنة، الراجل ده واقعي، الراجل ده واقعي، هو عايز يقوم الليل تلت ساعات كل ليلة بمعدل تسعين في المية من الأيام كل شهر، فقعد عموصل للمعدل ده وبخشوع، عموصل للمعدل ده قعد عشرين سنة، ليه؟ هو فاهم إن الموضوع سلم، هي لعبة يا جماعة! هو الدين ده لعبة! هو الدين ده كده هتنتظ لقيت نفسك بقت صديق و الا قدس، يبقى دية النقطة الأولانية، النقطة الثانية في البحث بعد مثالين في تصور الهدف واقعيون في تصور الطريق فبتقول بقى أختنا "ولو أردنا أن نعرض بعض المعوقات التي تقف أمام الشباب - بتبص لي كده ليه! - التي تقف أمام الشباب في الالتزام فهي كثيرة جدًا، فهي كثيرة جدًا " أنا هوقف عند هنا، مش هكمل البحث بتاع ولربك فاصبر، اكمله المرة الجاية والله يا اخواني أنا مش عارف أعمل ايه، يعني إنتو ما شاء الله مشاركتكم كثيرة وجميلة وكلها طيبة، وأنا حاطت الأبحاث قدامي، اللي بيتفرج عل الدرس فيديو هيشفني دلوقتي حاطت الأبحاث قدامي وقاعد اعيط قدامها، يعني أناقش الأبحاث دي كلها ازاي، نفسي أناقش هذه الأبحاث كلها يعني، وافيدكم في كل هذه الأبحاث، يعني ده بحث، وده بحث، وده بحث اهوت، يعني سبحان الله العظيم نفسي افيدكم في كل الابحاث والله يا جماعة لكن مش عارف، عشان كده أنا بسعى الآن إلى تزويد معيدين المعهد القرآني الدعوي، إن أنا أجيب لكم فريق من المربين يشيلوا معايا الأمور دي عشان إنتو متبخسوش حقمك، عشان إنتو تتبنوا صح، عشان أنتو تلاقوا فرصة، ممكن أناقش بحث ولربك فاصبر مثلاً وبحث تاني المرة الجاية إنما مش هقدر أناقش كل مرة بحث وأقف عشانه فيعني هاضطر أنا في الآخر اعدي الموضوع بسرعة شوية، فإن شاء الله نكمل بحث أختنا دي المرة الجاية.

مأساة مضايا

لإن يا جماعة يعني صراحة الواحد معذب والله يا اخواني، أنا امبارح يعني صحيت من النوم كده فقاعد زعلان وحزين كده يعني مهموم يعني مش مهموم من حاجة، مهموم بس من كتر المسئوليات، إن أنا حاسس أن ورايا مسئوليات كثير، فمش عارف أعمل ايه، ففتحت الموبايل كنت طلبت من اخويا دكتور محمد على ربنا يحفظه طلبت منه ايه، يفيدني كده ايه اللي بيحصل في مضايا في سوريا و ايه الأخبار اللي بتحصل هناك، فبعثت لي كمية من المقاطع والحاجات واللي بيحصل كده، فأنا ببص يا جماعة، أنا قعدت اتفرج عليها أنا فزعت يا جماعة، احنا بني آدمين والا وحوش ايه اللي بيحصل ده يا جماعة! أنا حسيت إن فيه فريسة واقعة ومليون وحش ملمومين حواليتها، مضايا حزب اللات محاصرها من سبع شهور ومانع دخول لقمة عيش ليها وخلع ورقة التوت الأخيرة وأعلن إنه هو بلطجي لإيران في المنطقة، وإيران بتدعم كل اللي بيحارب السنة بكل ما تستطيع من إمدادات والشعار بتاعها الجوع أو الركوع، وبشار ما اكتفاه ببراميل المتفجرات اللي بترميها طيراته على الناس وما اكتفاه بالصواريخ الكيميائية المجرمة دولياً اللي رماها على

الناس، ده بدأ دلوقتي يحارب بسلاح التجويع والشبيحة بتووعه بيهتفوا يا يفضل الأسد يا نولع البلد، وروسيا يعني جاية تقول هبحارب داعش، عشرين في المية من غارات روسيا لا علاقة لها بأماكن داعش أصلاً، يعني كان روسيا دي جاية تحارب طب هي جاية ليه، جايه عايزة تعمل ايه طب هي بتضرب الإسلام والا بتضرب ايه والا بتضرب مين، وأمريكا بتتهز كتافها وتقول مفيش بديل عن بشار، حتى بعد ما ضرب شعبه بالصواريخ الكيماوية حتى بعد ما ضربها، ليه يا أوباما إن شاء الله، لأن يجب أن نحافظ على التوازن، التوازن ده مصطلح شيك، مصطلح متمنتج، إنما المصطلح اللي بيدل عليه إن محدش ينتصر ومحدش يتهزم، تفضل دم في دم كده، محدش يغلب حد، ومجلس المجتمع الدولي ضميره مات خلاص في قرن حقوق الإنسان قاعدين يشوفوا الناس قاعدين يموتوا من الجوع وما ينطقوش، والاتحاد الأوربي شعاره وأنا مالي بالرمال المتحركة بتاعت الشرق الأوسط ده لما يموت واحد من السنة، إنما لما يموت شيوعي أو يهودي بيقلبوا الدنيا، والجامعة العربية، جامعة الأمم العربية يا سلام، المنظر الوحيد اللي بيضحك في المشهد كله، قاعدين كده لما سوريا تتقطع لخمس ست دويلات كل طائفة تاخذ لها دويلة والقصة تخلص وخلصونا، والأمين العام للأمم المتحدة بيعرب عن قلقه ويبستنكر، والناس قاعده تموت هناك، والأنظمة العربية بتتفرج وهي فرحانة ليه؟ كأنها بتقول للشعوب بتاعتها شوفوا اللي ما بيشر بش اللبن يحصله ايه في الآخر، شوفتوا بقى اللي بيعترضوا على الحكام والظلم بيحصله ايه في الآخر، عشان بقى تفهموا إنكوا لو اعتراضكم اهي دي النهاية بتاعتكم، دي نهاية كل واحد ما رضاش يركع للغرب، دي نهاية كل واحد رفع القرآن ورفع الشعار الإسلامي في الإصلاح، دي نهاية كل واحد بيجهر بكلمة الحق في وجه الظالم، عشان كده هم حاسين إنها رسالة عايزينها تفضل، عايزينها تفضل كده تبقى رسالة للشعوب العربية محدش يعترض وإلا دي نهاية اللي هيعترض، ايه المشهد الأليم ده يا جماعة! ايه المشهد الأليم اللي احنا عايشين فيه ده! في رقبة مين! في رقبة مين اللي بيحصل في مضايها ده! في رقبة مين الناس اللي بتموت من الجوع! في رقبة مين الاتنين واربعين ألف مواطن اللي بيموتوا من الجوع على البطيء دلوقتي! في رقبة مين اللي بياكلوا الوقتي حشائش الأرض وعايشين على ورق الشجر! في رقبة مين اللي عشان ما يموتوش بيغلقوا الملح في الميه ويشربوها عشان ما يموتوش! في رقبة مين الأطفال اللي مليون المستشفيات هناك بأمراض سوء التغذية ومعرضين للموت! في رقبة مين السبعة وتلاتين اللي ماتوا من الجوع لحد دلوقتي! في رقبة مين إن بعض الناس وصلت إنها كلت القطط والكلاب اليومين اللي فاتوا! في رقبة مين! ولكن أنا عايز أقولكم يا جماعة ما تخافوش يا جماعة، ما تخافوش، لو إنتو فاكرين إن أنا بتكلم دلوقتي عشان أعمل حملة بطاطين لمضايها أو عشان أقولكم اتبرعوا لمضايها، الكلمة دي مش هدفها كده، ولا أنا عايز كده، ما تخافوش يا جماعة، ما تخافوش لأن الغرب مش هيسيب المأساة اللي بتحصل في مضايها دية، دي حاجة فلتة إعلامية، ده تسريب إعلامي، كان غلط إنه هو يطلع ولكن طلع، والغرب أدكى من إنه يسيب اللي بيحصل في مضايها يستفز الناس ويستفز الأمة ويخلي الدعاة يحطوا أيديهم في إيد بعض ويخلي الشيوخ يفوقوا ويحطوا أيديهم في إيد بعض ويوحدوا الأمة تاني ويفوقوا النايمين اللي حالفين بالله إن هم ما يصحوا تاني، يبقى ما تخافوش يا جماعة الغرب ازكى من كده، عشان كده كنت بقول امبارح لآخواني إن في خلال ساعات الغرب هيتدخل ويدخل معونات غذائية لمضايها، النهاردة سمعت فعلاً إن فيه قوافل صغينة يعني، صغيرة الحجم ولكن قوافل بدأت تدخل لمضايها، ليه؟ لأن الغرب ازكى من إن هو يخلي النهاية الدراماتيكية المؤلمة اللي توقظ الأمة دي تبقى هي الموت، وهو بيفكر هو ايه الغباء ده، ده بدل نموتهم بالجوع ونفوق الأمة نموتهم بالقصف، احنا عندنا سيناريو تاني لتمويت الناس دي، ليه نموتهم بالجوع لما نقدر نموتهم بالقصف، ومن تحت التراييزة بيباصوا ورقة كده لحزب اللات وإيران ولبشار يقولولهم يا أغبيا يا أغبيا قدامكم براميل المتفجرات، قدامكم الشبيحة والإجرام بتاعهم، قدامكم قتابل النبال المجرمة دولياً اللي حزب اللات قذف بيها السنة هناك، ليه تلجأوا للمشهد الدرامي بتاع اللي بيموت من

الجوع ده، بعد ما بقى هيكل عظمي، بقى قدامكم إن إنتم تدبحوهم ومنظر الدم الأمة خلاص خدت عليه وكله هيمص ليمون وهيقول اللهم اهلك الظالمين بالظالمين وخلينا احنا كده قاعدين.

الحكمة والحل من مأساة مضايا

لما شفت اللي بيحصل يا جماعة، لما تدبرت في اللي بيحصل قلت اللهم ارفع غضبك ومقتك عنا، دي رسالة ليانا من ربنا بس رسالة شديدة أوي، ربنا بيقلنا فوقوا اللي بيحصل ده، اللي بيحصل ده له حكمة، إن ربنا يعرفنا إن اللي حصل ده له حكمة، الحكمة الأولانية يا جماعة إن المتهمين في جريمة مضايا مش حزب اللات بس اللي محاصرينا، المتهمين في جريمة مضايا دول كتير أوي، الشاب اللي كل تفكيره في دنيته وشهوته وبنيت ماشي معاها ده مجرم مشارك في جريمة مضايا، الداعية اللي عامل نفسه الشيخ بطليموس، وحالف ليشيل الكرة الأرضية على كتافه وفأكر إن لواحد هيقدر ينصر الإسلام، لا راضي يحط ايديه في ايد شيخ ولا راضي يحط ايده في ايد داعية تاني، ولا راضي يحط ايده في ايد إخوانه يبقى فريق يعملوا لدين الله، وفأكر إنه هيخلص الموضوع لوحده، ومنتحول لجزيرة معزولة ده مشارك في الجريمة، يعني عايزين نخرج من مضايا بإيه يا جماعة الحل مش حماسي، الحل مش حماسي، الحل مش ياللا، هيه مش ياللا على سوريا زي بعض الإخوة اللي عايزين كله يقوم طالع على سوريا مش ده الحل الحل مش حماسي الحل يا جماعة قضية مضايا وسوريا والعراق دي إنعكاس لمشكلة أكبر إنعكاس لمشكلة تمزق الأمة، احنا شوية شوية ... ربنا يقول **"وَلَا تَنَازَعُوا فَتَفْشَلُوا"** الأنفال:46، احنا متنازعين عشان كده فاشلين، هتسفري سوريا هتسافر سوريا تمشي مع مين، مع أحرار الشام والا مع جبهة النصرة والا مع داعش والا مع الجيش الحر والا مع الجيش اللي مش حر والا مع مجموعة القاعدة، هتسافر تعمل مع مين، اذا كان هم نفسهم بيقطعوا في بعض، اذا كان هم نفسهم متمزقين مع بعض، يا اخوانا احنا مصيبتنا في الأمة سواء هنا في مصر أو براها التمزق والتفرق، إن احنا شوية ...والله العظيم الفصائل المجاهدة في سوريا لو حطت ايدها في ايد بعض لا أمريكا ولا روسيا ولا حد يقدر إنه يقرب أصلاً ولا يقدر يقرب من سوريا، ولكن احنا متفرقين، عاملين زي جحا فلوسنا وقعت في حته رحنا ندور عليها في حته تانيه، احنا يا جماعة المشكلة في التمزق والتفرق، احنا قاعدين نقول ياللا، ياللا! يا عم الحل مش حماسي، الحل مش حماسي، الحل إن احنا نفهم، إندونيسيا دولة مكونة من عشر تلاف جزيرة، عشر تلاف جزيرة بيكونوا دولة، احنا التيار الإسلامي عشر تلاف جزيرة يكونوا دعوة، كل شيخ جزيرة، كل داعية جزيرة، كل موقع نت إسلامي جزيرة، كل جمعية خيرية جزيرة، كل كادر نشيط جزيرة، احنا مجموعة من الجزر، مفيش أي جزيرة فيه رابط ما بينها وبين التاني، فاحنا ناس متمزقين.

الرسالة الأخيرة

الرسالة الأخيرة يعني بعد رسالة ولا تنازعوا فتفشلوا، يعني اللي أنا بقول فيها لكل داعية بعد عن إخوانه وبعد عن التعاون مع إخوانه، إنت كل خطوة بعدتها عن أخ من إخوانك إنت دوست فيها على رقبة ألف أخ تاني، على مستقبل ألف أخ كانوا هيبقوا بكرة دعاة إلى الله بسبب تعاونك إنت والدعاة التانيين، بسبب تعاون الموقع بتاعك والمواقع التانية، بسبب تعاون شغلك مع شغل الآخرين، ولكن انت دوست على مستقبل غيرك للأسف الشديد، عايزين نفوق يا جماعة من الفرقة اللي احنا فيها، اخر حاجة بقولها للشباب اللي كل قضيته شهوته ومتعته ويجري على مكاتب الهجرة لكندا واستراليا عشان يخلص من مصر ويخلص من الواقع اللي هو عايش فيه ويجري يشوف شهادته ويشوف مصلحته هو في أكثر فترة الدين محتاجه فيها، بقول للشباب حسوا بإخوانكم، حسوا بإخوانكم، بلاش كتر الصور المؤلمة والأحداث المؤلمة يبرد دمكم ويموت إحساسكم، بلاش إنكم تعرضوا نفسكم لقول الله **"وَتَرْكُوكَ قَائِمًا"** الجمعة:11، لما سابوا النبي عشان يجروا على الدنيا، ما تجريش على دنيتك وتسبب دينك، ما تجريش على دنيتك وتنسى دينك، لو انت سببت الدين لوحده في أزمتة ربنا ممكن يسببك لوحده في قبرك، ربنا ممكن يسببك لوحده

في مشاكل دنيتك وأخرتك، ما تعرضش نفسك لقول الله "فَأْتَابَكُمْ عَمَّا بَغِمَ" آل عمران:153، زي مغميتوا الدين بتخليكوا عنه فنزل عليكم الغم بالهزيمة والكوارث اللي حصلت في الدنيا، أزمة مضايا أزمة عايزة حل يا جماعة، أزمة عايزة يعني نفهم الأزمة حصلت ليه، اللهم ارفع غضبك ومقتك عنا، اللهم لا تؤاخذنا بما فعلنا ولا بما فعل السفهاء منا، إن شاء الله بإذن الله يعني عايزين نعتبر من المشهد اللي بيحصل، ونستأنف إن شاء الله بإذن الله الإِسبوع القادم سبحانك اللهم وبحمدك أشهد أن لا إله إلا أنت استغفرك وأتوب إليك